

Juan

Ku frekuensia, nos ta instruí kreyentenan nobo pa lesa i studia e Evangelio di Juan. Tin diferente motibu pa esaki. Pa di promé, e buki tabata skirbí pa henter poblashon di mundu—no hudiunan so òf paganonan so. Di dos, Juan a splika bèrdatanan fundamental i profundo na un manera komprendíbel. Pa di tres, e buki ta presentá salbashon na un forma kla i konvensiente. (No ta pa kasualidat ku Juan 3:16 ta aparesé den e Evangelio aki!) E di kwater motibu ta pasobra un meta di e outor tabata pa konfirmá e lektor den su fe i konfiansa den Hesus komo divino!

Mas òf ménos 40 aña despues ku e promé buki di Tèstament Nobo a wòrdu skirbí, Spiritu Santu a inspirá e apòstel Juan pa kompositá e di kwater Evangelio...e último Evangelio ku a wòrdu skirbí. Dor ku tabata tantu aña despues ku e eventonan a sosodé, Juan tabatin tempu pa meditá tokante e bida di Hesus. Pues, en kontraste di e Evangelionan Sinóptiko (Mateo, Marko i Lukas) ku ya kaba a presentá echunan i faktonan tokante bida di Hesus sin hopi komentario, e outor di e Evangelio di Juan a splika nifikashon di e storia, a interpretá e relatonan di Hesus Su bida ku muchu mas komentario, i a kompartí su konklushonnan ku su lektornan tokante e Persona úniko! E Evangelio aki ta skirbí mas na un forma teológiko.

I. NÒMBER DI E BUKI

Desde antigwedat, e di kwater Evangelio a haña e título griego KATA IOANNEN (“segun Juan”). Ku tempu e titulo a bira KATA MATHAION IOANNES (“Evangelio segun Juan”). E nòmber Juan (IOANNES) ta bin for di e nòmber hebreo JOHANAN ku ta nifiká “Yahweh ta grasiioso”. Mas despues, nòmber di e buki a bira simpelmente “Juan”.

II. OUTOR DI E BUKI

Ken tabata e outor di e Evangelio aki? Méskos ku e otro Evangelionan, outor di e buki no a identifká su mes. Ma kontrario di e otro Evangelionan, hopi diferente nòmber ta wòrdu surgerí komo outor di Evangelio di Juan: Lázaro, Nikodemo, e hóben ku a hui sunú den Marko (Marko 14:50-51), un eskritor desconosi den e di dos siglo, Juan (un ansiano di iglesia di Efeso, ku tabata un disipel di aspòstel Juan).

Ma mirando tantu e evidensia interno komo e evidensia eksterno, no tin hopi duda ku e outor tabata Juan, yu di Zebedeo, e último apòstel ku a muri, ku probabelmente a bira lider di iglesia di Efeso. Tambe ta parse obvio ku e outor a asumí ku su lektornan lo sa su identidat. Laga nos mira e evidensia:

A. EVIDENSIA INTERNO

1. E outor lo tabata un hende ku a pensa i papia na idioma armeo-hebreo, maske el a skirbi na idioma griego. Esaki ta visto for di e echu ku tin masha poko frase subordiná den e teksto. Vários biaha e outor a usa un palabra armeo-hebreo i despues a spliké.

2. E outor lo tabata un habitante di Israel, pasobra klaramente e eskritor tabatin bon konosementu di e geografia di Israel, especialmente di Herusalèm:

a. Nota e outor su deskripshon detayá di Herusalèm i e region den serkania:

- El a distinguí “*Betania na e otro banda di Jordan*” (1:28) for di e Betania pegá ku Herusalèm
 - E outor a referí na sitionan ku no ta menshoná mas biaha den Beibel: Enon (3:23), Efrain, ku ta keda pegá ku desierto (11:54)
 - Kòrdando ku Juan a skirbi su Evangelio despues di destrukshon di Herusalèm (A.D. 70), su deskripshon di e tèmpel (2:14-16; 8:20; 10:23) ta indiká ku e tabatin bon konosementu di e suidat promé ku su destrukshon
 - “*Awor na Jerusalèm, na e porta di karné, tin un tanki di awa ku na hebreo yama Betèsda, i ku tin sinku veranda di pilar*” (5:2)
 - “*tanki di Siloam*” (9:7) tabata na Herusalèm
 - “*Awor Betania tabata serka di Jersualèm, na mas o menos tres kilometer di distansia*” (11:18)
 - Hòfi di Getsemané ta keda na “*otro banda di Roi Kedron*” (18:1)
 - Stul di hues tabata “*pafó...na un lugá ku yama Listóstrotos*” (19:13)
 - Jesua a wòrdu krusifiká “*na e lugá ku yama Lugá di Kalpachi*” (19:17)
- b. Nota e outor su konosementu di Galilea
E outor a deskribí diferente stat di Galilea ku eksaktitut: Nazarèt (1:44-46); Kana (2:1); Kapernaum (2:12).
- c. Nota ku e eskritor konosé Samaria
- E outor a deskribí e pos na Sikar komo un un pos hundu (4:5-6,11)
 - Seru di Gerizim, unda samaritanonan ta adorá, tabata serka e pos (4:20-21)
3. E outor lo tabata un hudiu
- a. E tabata konosé e fiestanan religioso hudiu
- Fiesta di Pasku (2:13,23; 4:45; 6:4; 11:55-56; 12:1,12,20; 13:1; 18:28,39; 19:14)
 - Fiesta di Tèntnan (7:2,8,10-11,14,37-39)
 - Fiesta di Dedikashon (10:22; kisas 5:1 ta deskribí e mésun fiesta)
- b. El a komprendé kustumbenan hudiu
- Fiesta di kasamentu (2:1-10)
 - Sermonio di purifikashon (3:25; 11:55)
 - Kustumbenan di deramentu (11:38,44; 19:40)
 - Wardamentu di Sabat (5:9-10; 9:14-16; 19:31)
- c. E tabata na altura loke hudiunan a pensa
- Di e binida di Mesias (1:19-28)
 - Tokante samaritanonan (4:9) i nan adorashon (4:20)
 - Inferioridat di hende muhé (4:27)
 - Tokante Sabat (5:10; 7:21-23; 9:14-16)
 - Por eredá konsekuensianan di piká di mayornan (9:2)
- d. El a komprendé i sita Tèstament Bieu (12:39,40; 13:18; 19:36-37)
Di e opservashonnan aki, no tin masha duda ku e outor tabata un hudiu.
4. E outor lo tabata testigu di e bida i ministerio di Hesus.
- a. El a laga sa ku e tabata un testigu (1:14; 19:35; 21:24-25)
- b. El a duna detayenan ku un testigu so por tabata sa
- I) Numbranan (2:6; 6:13,19; 12:3-5; 21:8,11)
- II) Nòmbranan (1:45; 3:1; 11:1; 18:10)
- III) Otro
- E ora ku Hesus a sinta na e pos di Sikar (4:6)
 - E pan tabata trahá di puspas (6:9)
 - E fragansia di Maria su perfume di nardo (12:3)
 - E momento ku Hudas a bandoná e sala ariba (13:30)
 - Detayenan di Hesus Su rat (kapítulonon 18-19)

5. E outor lo tabata un disipel
 - a. Ta parse ku e tabata huntu ku Hesus fo'i komienso di Su ministerio Evangelio di Juan so ta konta di e promé eventonan di Hesus Su ministerio: Su promé milager (2:1-11), e promé biaha ku Hesus a kore ku hende for di tèmpel (2:13-22), Hesus Su di dos milager (4:46-54).
 - b. E outor a identifiká su mes komo “*e disipel ku Jesus tabata stima*” (13:23; 19:26; 20:2; 21:7,20). Juan 21:20-24 ta kita tur duda ku “*e disipel ku Jesus tabata stima*” ta outor di e buki.
 - c. Tambe ta parse ku e outor ta referi na su mes ku e frase “*e otro disipel*” (18:15-16; 20:2) Den 21:2, e outor tambe a menshoná “*e yu hòmbènan di Zebedeo*”.
 - d. Ousensia di apòstel Juan su nòmber den e Evangelio ta notabel
 - Juan tabata un apòstel prominente den e otro Evangelionan. E tabata entre e tres apòstel mas será ku Hesus (Mateo 17:1; 26:37; Marko 5:37; 9:2; 14:33; Lukas 8:51; 9:28). En bista di e echu ei, ta hopi straño ku su nòmber no ta menshoná den e Evangelio. Ma si e ta e eskritor humano, esei lo splika e motibu pa e ousensia aki.
 - Ademas, ta interesante ku asta nòmber di Juan su ruman, Santiago, no ta menshoná den e Evangelio. Den 21:2, e outor por a skirbi “Juan i Santiago”, ma el a opta pa skirbi “*e yu hòmbènan di Zebedeo*”.
 - e. E echu ku diferente biaha e outor tabata sa loke Hesus tabata pensa, ta indiká ku e eskritor tabata hopi será ku Hesus (2:24-25; 6:6,61,64; 13:1-3,11; 18:4).

Ta klaro ku esun ku a skirbi e buki tabata hopi será ku Hesus. Ta obvio ku Pedro no a skirbi e buki pasobra e ta menshoná komo un di e partisipantenan den e storia. Santiago, ruman di apòstel Juan, a muri na aña A.D. 44 (Echunan 12:2), basta aña promé ku e buki a wòrdu skirbí. Pues, Santiago no por a skirbi un buki fechá despues di su morto. Di e tres apòstelnan mas será ku Hesus, esei ta laga solamente Juan komo e pusíbel outor di e Evangelio.

B. EVIDENSIA EKSTERNO

Maske Juan su nòmber no ta aparesé den e buki, lidernan di iglesia antiguo ku regularidat a identifiká e outor komo apòstel Juan.

1. E *Fragmento di Muratoria* (A.D. 170-180) a inkluí e Evangelio di Juan den un lista di bukinan aseptá.
 2. Irenaeus (A.D. 130-200) tabata un disipel di Polikarpo (A.D. 70-160) i Polikarpo tabata un disipel di e apòstel Juan. Irenaeus a skirbi Polikarpo afirmando ku Juan a skirbi e Evangelio: “Juan, disipel di Señor, kende tabata len na Hesus Su pechu, e mes a produsí un Evangelio for di su residencia na Efeso na Asia.”
 3. Tatian (A.D. 150) a referí na e Evangelio di Juan den su skirbimentu *Diatessaron*.
 3. Teófilo di Antiokia (A.D. 165) a referí na e Evangelio.
 4. Clemente di Alexandria (A.D. 150-215) a skirbi ku Juan tabata konsiente di e echunan presentá den e otro Evangelionan i ku Spiritu Santu a gui'é pa kompositá un “Evangelio spiritual”. El a sita kasi tur kapítulo di Juan
 5. Tertullian di Carthage (A.D. 200) a sita Juan
 6. Hippolytus (A.D. 225)
 7. Origen (A.D. 230)
- Iglesia antiguo a aseptá ku Juan a skirbi e Evangelio.

C. BIOGRAFIA DI JUAN

Maske apòstel Juan su nòmber no ta aparesé den e Evangelio, Tèstamènt Nobo ta menta su nòmber diferente biaha: (Mateo [3X], Marko [10X], Lukas [6X], Echunan [10X]).

Juan tabata yu di Zebedeo (Mateo 4:21; Juan 21:2). Komparando Mateo 27:56, Marko 15:40 ku Juan 19:25, ta parse ku nos por dedusí ku nòmber di su mama tabata Salomé. Ta

pusíbel ku Salomé tabata ruman muhé di Maria, mama di Hesus. Si esei tabata e kaso, anto Juan tabata primo di Hesus di parti di Su mama. Santiago, ruman di Juan (Mateo 4:21; Marko 1:19-20), tambe tabata un disipel di Hesus.

Zebedeo su famia lo tabata bon pará ku nan negoshi di piskamentu na Laman di Galilea. Marko 1:19-20 ta indiká ku nan tabatin “*sirbidónan kontratá*”. Lukas 5:9-10 ta laga sa ku Pedro i Andres tambe tabata sosio den e negoshi. Pues, ta parse ku “Zebedeo & Sons” tabata un empresa di un mínimo di shete persona: Zebedeo, Santiago, Juan, Pedro, Andres, i por lo ménos dos empleado adishonal.

Probabelmente Juan tabata un siguidó di Juan Boutista promé ku el a kuminsá sigui Hesus. Juan 1:35-41 ta indiká ku dos disipel di Juan Boutista a sigui Hesus. Outor di e buki a identifiká Andres komo ún di e dos disipelnan, ma no a identifiká e otro. Nos a mira kaba ku Andres i Juan tabatin hopi kontakto ku otro dor di trabou. Lo no ta nada straño si e disipel no-identifiká tabata Juan. Si esei ta e kaso, anto esei ta indiká ku Juan a kompañá Hesus durante Su promé paseo na Galilea (2:2) i ku e tabata presente pa Hesus Su promé milager na Kana (2:1-11).

Un tempu òf otro, Hesus a invit’ é pa bira Su disipel tempu kompleto (Mateo 4:21-22; Marko 1:19-20; Lukas 5:1-11). Juan i su ruman, Santiago, a bandoná e negoshi di Zebedeo pa sigui Hesus. Nan a forma parti di e diesdos apòstelnan (Mateo 10:2-4; Lukas 6:12-16). Nos a nota kaba ku Juan, i su ruman, Santiago, i Pedro, tabata e tresnan ku tabatin mas kontakto ku Hesus. Ma Juan tabata esun mas será ku Hesus. Nos ta kòrda ku e ta yama su mes “*e disipel ku Jesus tabata stima*” (13:23; 19:26; 20:2; 21:7,20) i tabata asina komfortabel ku Hesus ku e tabata len na Su pechu na e Sena di Pasku (13:23).

Ora Hesus a wòrdu arestá, Juan a hui. Ma despues, e tabatin kurashi pa presentá na rat di Hesus dor ku e tabatin kontakto ku sierto famia di e sumosaserdote (18:15-16). Kisas e hudiunan tabata konosé pasobra el a representá Zebedeo su negoshi na Herusalèm. I Juan tabata e úniko apòstel ku tabata asina leal ku el a presentá na e krus (19:26-27). Hesus, komo yu mayó, a enkargá Juan ku responsabilidadat pa Su mama (19:26-27). Juan tabata huntu ku Pedro durante e dianan ku Hesus tabata derá i nan dos a kore bai graf ora nan a tende ku e graf tabata bashí. Ta parse ku Juan tabata e promé apòstel ku a kere ku Hesus a resusitá (20:8).

Despues di Pentekostes, Juan a bira un di e lidernan (“*pilarnan*”) di iglesia di Herusalèm (Galationan 2:9). Segun buki di Echunan, Juan a kompañá Pedro ku frekuensia (Echunan 3:1; 4:13; 8:14) i tabata un apòstel prominente na Herusalèm. Na aña A.D. 44, Herodes Agripa I a mata Santiago, ruman di Juan, ku spade (Echunan 12:2).

E romanonan a destruí Herusalèm na aña A.D. 70. Segun tradishon, Juan a biaha pa Efeso nèt promé ku esei i a kontinuá ku su ministerio ei. Talbes Juan a skirbi su tres kartanan (1 Juan, 2 Juan i 3 Juan) i tambe su Evangelio for di Efeso. Mas òf ménos na aña A.D. 95, el a wòrdu deportá na isla di Patmos pa motibu di su fe durante persekushon na man di Emperadó Domitian (A.D. 81-96). Tabata na e isla aki el a skirbi e buki di Revelashon (Revelashon 1:9).

Tradishon tambe ta indiká ku Juan a fayesé na edat atvansá. Juan 21:21-24 ta duna impreshon ku e apòstel su edat lo tabata basta haltu tempu ku el a skirbi su Evangelio. Talbes Emperador Nerva, susesor di Domitian, a libra Juan for di Patmos i Juan a regresá na Efeso, kisas na aña A.D. 96. El a biba aki te ku el a muri durante reinado di Emperador Trajan (A.D. 98-117). Tambe segun tradishon, Juan ta e úniko apòstel ku no a muri komo martir.

Tantu Juan komo su ruman, Santiago, lo tabatin karakter rabioso, pasobra Hesus a yama nan “*Boanerges, ku ta nifiká: ‘Yunan di Strena’*” (Marko 3:17). Nos por nota un aktitut vegativo den nan ora nan a pidi Hesus pa manda kandela for di shelu pa mata hende ku no a risibí nan (Lukas 9:52-56). Ademas, Juan i Santiago tabata leal na Hesus, maske nan tabata kiboká (Lukas 9:49). Den Mateo 20:20-28, Juan, kompañá pa su ruman i mama, a pidi ku nan por tin e puesto mas haltu na shelu. Maske esei ta demonstrá orguyo, na mes tempu, e ta indiká konfiansa i apresio pa ku Kristu.

Apesar di su karakter rabioso i violento, ta maraviyoso pa mira ku Kristu a transform’ é i awe nos konosé Juan komo e apòstel di amor! Esei ta enkurashá nos, pasobra nos tur tin kos den nos bida i karakter ku tin mester di transformashon. Dios *por i ta* kambia hende!

III. FECHA DI E BUKI

Nos a menshoná ku Juan probabelmente tabata na e stat di Efeso, na Asia Menor (Turkia awendia), tempu ku el a skirbi e Evangelio aki. Nos tambe a indiká ku probabelmente el a skirbi e Evangelio promé ku e tabata enkarselá na isla di Patmos.

E fragmento mas antiguo di Tèstamentu Nobo ku ta eksistí awendia ta konosí komo "Fragmento di John Ryland" i ta kontené solamente sinku vèrsíkulo di 18:31-33,37-38. E ta fechá mas òf ménos A.D. 117-138. Pues, ta basta sigur ku Juan a skirbi su Evangelio promé ku e di dos siglo.

Tambe ta probabel ku e di kuater Evangelio a wòrdu skirbi despues di Mateo, Marko i Lukas. En general, evangélikonan ta di opinion ku Juan a skirbi e Evangelio promé ku el a wòrdu enkarselá riba isla di Patmos durante tempu ku Emperador Domitian tabata na mando (A.D. 81-96). Pues e fecha mas probabel ku e apòstel lo a skirbi su buki ta A.D. 85...sikiera entre A.D. 80-90.

IV. LEKTORNAN DI E BUKI

Kada eskritor di e Evangelionan a presentá Hesus segun e nesesidat di e lektornan. E Evangelionan Sinóptiko tabata skirbí pa evangelisá un generashon. Juan a skirbi mas tantu pa kreyentenan ku ta madurando. Nan ya kaba tabatin un bon konosementu di e bida di Hesus for di e otro Evangelionan. Juan a skirbi su Evangelio pa iglesia en general—pa mundu kompleto. Tempu ku el a skirbi su buki, iglesia ya kaba tabata eksistí na tur parti di Impero Romano.

E buki no ta ménos hudiu ku e otro Evangelionan. Ma Juan a skirbi su buki kòrdando e hudiunan. Tin ora e outor a usa un palabra griego òf latin i a tradusié na idioma armeo-hebreo.

- “...Pilato...a bai sinta riba e stul di hues, na un lugá ku yama Litóstrotos, òf na hebreo Gábata” (19:13)
- “...Jesus...kargando Su krus, a sali bai na e lugá ku yama Lugá di Kalpachi, ku na hebreo ta wòrdu yamá Gólgota.” (19:17)

Ma ta visto ku e apòstel a skirbi pa paganonan tambe. E apòstel a tradusí palabranan armeo-hebreo pa su lektornan no-hudiu por komprensé:

- “Rabí (ku tradusí ta nifiká Maestro)” (1:38)
- “‘Nos a haña e Mesias’ (ku tradusí ta nifiká Cristo)” (1:41)
- “‘...bo lo wòrdu yamá Sefas (ku tradusí ta nifiká Pedro)’” (1:42)
- “Awor na Jerusalèm, na e porta di karné, tin un tanki di awa ku na hebreo yama Betèsda, i ku tin sinku veranda di pilar.” (5:2)
- “‘Bai laba bo mes den e tanki di Siloam’ (ku tradusí ta nifiká: Mandá)” (9:7)
- “...Maria...a drak wak i a bis’E na hebreo: ‘Rabuni!’ ku ta nifiká: Maestro” (20:16)

E eskritor tambe a duna informashon adishonal pa splika kustumbenan hudiu pa su lektornan por komprensé:

- “Pasku di e hudiunan tabata serka” (2:13)
- “Pasobra hudiu no tin nada di aber ku samaritano.” (4:9)
- “...nan a tuma e kurpa di Jesus i a lor’ é den tela di lino ku e spesereinan, segun e kustumber di deramentu di e hudiunan” (19:40)

Ademas, nos ya kaba a mira ku e outor a duna mas splikashon tokante geografía di Israel. Esei tambe ta indiká ku Juan a skirbi pa hende ku no tabata hudiu.

V. PROPOSITO DI E BUKI

E buki di Juan ta e úniko Evangelio ku ta deklará kla su proposito: “Tambe Jesus a hasi hopi otro señal den presensia di Su disipelnan, kualnan no ta pará skirbí den e buki aki; ma esakinan a wòrdu skirbí pa boso kere ku Jesus ta e Cristo, e Yu di Dios, i pa keriendo, boso por tin bida den Su nòmber.” (20:30-31).

E apòstel su proposito tabata:

- Pa su lektornan ta sigur ku Hesus ta e Kristu—e Mesias
- Pa su lektornan kere, konfia i sa ku Hesus ta e Yu di Dios (dibino)
- Pa su lektornan tin bida etèrno pa medio di konfia den Hesus

Pues, Juan tabatin propositonan pa ku apologétika i evangelismo. Nos por mira kla su énfasis riba evangelismo den e tres palabra ta destaká: señal, kere, bida (20:30-31). Laga nos para ketu i pensa tokante e palabranan aki ku ta indiká e apòstel su proposito pa skirbi e di kuater Evangelio.

1) E *señalnan* ku Hesus a hasi a indiká ku Dios ta obrando dor di djE. Juan su proposito pa ku apologétika tabata hopi similar na su proposito evangelístiko. Juan a skirbi pa konvensé su lektornan ku e hòmber Hesus di bèrdat ta Dios i Salvador di mundu (1:41; 3:16; 4:25-26; 8:58). Juan a konsentrá riba ocho señal òf prueba (milager) fuera di Su resurekshon ku ta indiká Hesus Su bèrdadero identidat. Intenshon di e señalnan tabata pa guia na fe.

- Awa a bira biña – 2:1-11
- Sanashon di yu di e ofisial di rei – 4:46-54
- Sanashon di hòmber lam – 5:1-18
- Duna kuminda na multitud – 6:1-15
- Kamna riba awa – 6:16-21
- Sanashon di e hòmber siegu – 9:1-41
- Resurekshon di Lazaro – 11:1-57
- Kohementu milagroso di piská – 21:6-11

2) *Kreensia, fe i konfiansa* mester ta e reakshon pa ku e señalnan. Kreensia i fe ta un di e lemanan klave di e buki. E palabranan aki ta usá 98 biaha den e buki—dos bes mas tantu ku e Evangelionan Sinópiko ta usa e palabra. Tambe ta notabel ku Juan, den e prólogo, a indiká su proposito bisando ku Juan Boutista a bin “*komo testigu pa e duna testimonio di e lus, pa tur kere pa medio di dje*” (1:7). I tambe e outor a klousurá e buki ku un deklarashon similar (20:30-31). Ademas, fe i inkredulidat pa ku Hesuskristu ta bin dilanti ripetidamente den e buki (1:12; 3:36; 5:24-29; 10:27-29; èts.).

3) Ora un persona ta kere den Hesus, e ta haña *bida etèrno*. Pues, e eskritor su proposito tabata pa konvensé e lektor hudu òf pagano (apologétika) resultando den su konfiansa den Hesuskristu pa e yega na salbashon (evangelistiko) i pa fortifiká fe di kreyentenan (edifikashon). E tabata ke pa su lektornan ta konvensé ku “*Jesus ta e Cristo, e Yu di Dios*”.

I ta bon pa mensioná ku talbes Juan a skirbí pa kombatí Dosetismo, e doktrina ku a siña ku Hesus no tabata hende. Juan 1:14 ta laga sa bon kla ku “*e Palabra a bira karni i a biba meimei di nos...*”

VI. STRUKTURA DI E BUKI

Nota diferente pusíbel struktura di e buki:

A. STRUKTURA BASÁ RIBA 12:36

Segun algun studiante di Beibel, 12:36 ta un punto di transishon den e buki. E promé parti di e buki (1:1-12:36a) ta konsentrá riba Hesus Su ministerio públiko ku durashon di tres aña. E outor ta trese dilanti diferente milager di Hesus. Foko di e di dos sekshon ta riba Hesus Su ministerio privá (12:36b-21:25) ku durashon di algun dia. E parti aki ta enfatisá diskursonan.

B. STRUKTURA BASÁ RIBA E LEMA DI FE-KREENSIA

No tin duda ku Juan ta e Evangelio di kreensia-fe-konfiansa den Kristo Hesus. Lo siguiente ta un struktura basá riba e lema topikal ei, presentá pa Merrill Tenney:

- I. E PRÓLOGO - 1:1-18
Lema Presentá: Kreensia
- II. E PERIODO DI KONSIDERASHON - 1:19-4:54

- Presentashon di e Obheto di Kreensia
 - A. Juan Su Testimonio - 1:19-51
 - B. Hesus Su Obranan - 2:1-22
 - C. Hesus Su Palabranan - 2:23-4:54
- III. E PERIODO DI KONTROVERSIA - 5:1-6:71
 - Kreensia i Inkredulidat
 - A. Presentá den Akshon - 5:1-18
 - B. Presentá den Argumento - 5:19-47
 - C. Presentá den Demonstrashon - 6:1-21
 - D. Presentá den Diskurso - 6:22-71
- IV. E PERIODO DI KONFLIKTO - 7:1-11:53
 - Bataya Entre Kreensia i Inkredulidat
 - A. E Konflikto Deskribí 7:1-8:59
 - 1. Ku Su Rumannan 7:1-9
 - 2. Ku e Multitutnan - 7:10-52
 - 3. E Muhé Gará den Adulterio 7:53-8:11
 - 4. Ku e Fariseonan i Hudiunan 8:12-59
 - B. E Konflikto Ilustrá - 9:1-11:53
 - 1. Pa Medio di e Hòmber Siegu 9:1-41
 - 2. Pa Medio di e Diskurso di e Wardadó - 10:1-21
 - 3. Pa Medio di Argumento - 10:22-42
 - 4. Pa Medio di Resurekshon di Lázaro - 11:1-53
- V. E PERIODO DI KRÍISIS - 11:54-12:36a
 - Deklarashon di Kreensia i di Inkredulidat
- VI. E PERIODO DI KONFERENSIA - 12:36b-17:26
 - Fortifikashon di Kreensia
 - A. Transishon - 12:36b-13:30
 - B. Konferensia ku e Disipelnan - 13:31-16:33
 - C. Konferensia ku e Tata - 17:1-26
- VII. E PERIODO DI KULMINASHON - 18:1-20:31
 - Viktoria Riba Inkredulidat
 - A. E Traishon - 18:1-27
 - B. E Rat Dilanti Pilato - 18:28-19:16
 - C. E Krusifikashon - 19:17-37
 - D. E Deramentu - 19:38-42
 - E. E Resurekshon - 20:1-29
- VIII. E EPÍLOGO - 21:1-25
 - Responsabilidat di Kreensia

C. STRUKTURA BASÁ RIBA E LEMA KU HESUS TA YU DI DIOS

E siguiente skema ta basá riba e lema ku Hesus ta e Yu di Dios, presentá tantu pa John MacArthur komo Bruce Wilkinson:

- I E INKARNASHON DI E YU DI DIOS – 1:1-18
 - A. Su Eternidat – 1:1-2
 - B. Su Obra Pre-Inkarnashon – 1:3-5
 - C. Su Anunsiadó – 1:6-8
 - D. Su Rechaso – 1:9-11
 - E. Su Aseptashon – 1:12-13
 - F. Su Divinidat – 1:14-18
- II E PRESENTASHON DI E YU DI DIOS – 1:9-4:54
 - A. Presentashon di Kristu dor di Juan Boutista – 1:19-34

- B. Presentashon di Kristu na Disipelnan di Juan – 1:35-51
- C. Presentashon di Kristu na Galilea – 2:1-12
- D. Presentashon di Kristu na Judea – 2:13-3:36
- E. Presentashon di Kristu na Samaria – 4:1-42
- F. Presentashon di Kristu na Galilea – 4:43-54
- III. E OPOSISHON KONTRA E YU DI DIOS – 5:1-12:50
 - A. Oposishon na e Fiesta na Herusalèm – 5:1-47
 - B. Oposishon durante Pasku na Galilea – 6:1-71
 - C. Oposishon na e Fiesta di Tèntnan na Herusalèm – 7:1-10:21
 - D. Oposishon na e Fiesta di Dedikashon na Herusalèm – 10:22-42
 - E. Oposishon na Betania – 11:1-12:11
 - F. Oposishon na Herusalèm – 12:12-50
- IV. E PREPARASHON DI E DISIPELNAN DOR DI E YU DI DIOS – 13:1-17:26
 - A. Den e Sala Ariba – 13:1-14:31
 - B. Na Kaminda pa Hòfi – 15:1-17:26
- V. E EHEKUSHON DI E YU DI DIOS – 18:1-19:16
 - A. E Rechaso di Kristu – 18:1-19:16
 - B. E Krusifikashon di Kristu – 19:17-37
- VI. E RESUREKSHON DI E YU DI DIOS – 19:38-21:23
 - A. E Deramentu di Kristu – 19:38-42
 - B. E Resurekshon di Kristu – 20:1-10
 - C. E Aparishonnan di Kirsto – 20:11-21:23
- VII. KONKLUSHON – 21:24-25

VII. OPSERVASHONNAN DI E BUKI

Nos por nota diferente punto ku ta destaká di e buki:

A. PRÓLOGO TEOLÓGIKO

Promé ku Juan a kuminsá kontá e storia di Hesus Su bida terenal, el a hasi algu ku e otro Evangelionan no a hasi. Juan a kuminsá ku e pre-eksistensia di e Yu di Dios (1:1-5)—demonstrando ku E tabata divino promé ku El a nase. Anto e outor a enfatisá e grasia di Dios den e inkarnashon—“*e Palabra a bira karni i a biba meimei di nos*” pa revelá Dios na hende (1:14-18).

B. STAIL ÚNIKO

1. Juan a konsentrá riba sierto lema doktrinal

E Evangelionan Sinóptiko ta presentá Hesus for di un perspektiva teológiko. Ma en kontraste, Juan su buki ta prinsipalmente i riparabelmente teológiko.

Manera nos a kaba di mira, e buki ta habri deklarando ku Hesus ta úniko, spesial...E ta Dios (1:1-18)! E divinidat di Hesus ta bin dilanti ku frekuensia (6:35; 8:12; 10:7,9; 10:11,14; 11:25; 14:6; 15:1,5; 20:28-31; èts.). For di e promé vèrsíkulo te na final, esaki ta un foko di Juan. Salbashon pa medio di Hesukristu—kon hende mester reakshoná pa ku e echu ku Hesus ta Dios—tambe ta enfatisá (1:1-18; 6:35,48; 8:12; 10:7,9; 10:11-14; 11:25; 14:6; 17:3).

2. E di kwater Evangelio ta hasi uso di vokabulario i frasenan simpel pa presentá bèrdatan doktrinal profundo.

Juan su stail di skirbi ta simpel. Pa un persona ku ta lesa griego, Juan su griego ta fásil pa lesa. Ma maske e ta simpel, e kontenido ta profundo. Martin Luther a skirbi, “Nunka den mi bida mi a yega di lesa un buki skirbí ku palabranan mas simpel ku esaki, i tòg tan profundo.”

Juan su vokabulario ta asina distinto ku ta fásil pa rekonosé un teksto tumá for di e di kwater Evangelio. Sierto palabra klave ta keda ripití: bida, lus, skuridat, obra, mundu, kere,

fe/konfiansa, karni, ora, bèrdad/bèrdadero, odia, risibí, stima/stimashon, kita, e Palabra, huisio, manda, prinsipio, konosé, gloria/glorifika, testigu/testimonio, keda, e Tata, e Yu, e Konsolador. Mirando e palabranan aki tambe ta hasié opvio ku Juan su énfasis ta doktrinal.

3. Juan a hasi uso di diferente tipo di paralelismo i kontraste

Por ehèmpel, por haña e kontraste lus—skuridat; bida—kondenashon/morto; stimashon—odio; fe—inkredulidat/duda; shelu—tera; oposishon—trankilidat. Tambe fe ta guia na bida etèrno (3:16,36)—inkredulidat ta guia na kondenashon etèrno (3:18,36; 5:24-29; 10:27-29); èts. Un momentu tin tristesa i e siguiente momentu tin alegria.

4. Juan su kontenido tabata muchu mas selektivo ku e Evangelionan Sinóptiko

E Evangelio di Juan ta konta e storia di Hesus. Ma e no ta un biografia kompleto di Su bida. E outor klaramente ta desaroyá sierto lema. Ku esei na mente, el a selektá i kompartí sierto episodio for di bida di Hesus ku ta ilustrá i harmonisá ku su lema.

Juan a ignorá nasementu i adolesensia di Hesus. E eskritor a kuminsá konta di Hesus mas òf ménos tempu di Su boutismo—sin menshoná Hesus Su boutismo. En kontraste, e outor a relatá muchu mas di Hesus Su kombersashonnan personal ku diferente persona (3:1-15; 4:1-26,43-53; 5:1-15; 9:1-38; 11:17-40), Su kombersashonnan personal ku diferente di Su disipelnan (1:40,42,43-44,47-51; 6:5,8,68; 12:4-8,22; 13:6-9,26-30; 14:5,8-10,22-24; 18:11; 20:10-18,26-29; 21:2,15-22), i su diskursonan ku Su disipelnan (14-17). Tambe Juan a trese dilanti por lo ménos seis konflikto ku e hudiunan (2:18-20; 5:16-47; 6:41-59; 7:15-44; 8:31-58; 10:22-39)

5. Juan a introdusí su lektornan na sierto hende anto mas despues a bolbe presentá nan na un otro okashon.

- Nikodemo (3:1-20; 7:50-52; 19:39)
- Felipe (1:43-46; 6:5-7; 12:20-22; 14:8-11)
- Tomas (11:16; 14:5,6; 20:24-29)
- Maria i Marta (11:1-40; 12:2-8)
- Maria, mama di Hesus (2:1-5; 19:26,27)

Otro Evangelionan tambe ta hasi esaki, ma ku ménos frekuensia. Ademas, esnan ku nan ta keda trese dilanti ta hende mas renombrá (manera Pedro òf Judas). Juan a usa hende konosí i desconosí komo ilustrashonnan di fe i inkredulidat.

C. AHUSTANDO KRONOLOGIA KU E EVANGELIONAN SINÓPTIKO

Sigur kronologia no tabata tan importante den e buki aki ku tabata e kaso ku e Evangelionan Sinóptiko. Asta, tin ora ta parse ku eventonan den e buki di Juan no ta sosodé mèsun tempu ku e Evangelionan Sinóptiko a indiká.

Un ehèmpel di esei ta e echu ku e Evangelionan Sinóptiko a indiká ku Hesus a kome e kuminda di Pasku i a inisiá Sena di Señor djaweps anochi i ku El a wòrdu krusifiká djabièrna. En kontraste, den 18:28, djabièrna mainta, e hudiunan “*no a bai den e Pretorio, pa nan no wòrdu kontaminá, ma pa nan por kome e Pasku*”. Pues, pakiko e disipelnan a kome e kuminda di Pasku djaweps?

E hudiunan den era di Hesus tabatin dos sistema diferente pa konta tempu. Pa hudiunan di nort (Galilea), dia a kuminsá ora solo a sali i a finalisá ku salida di solo e siguiente dia. Ma hudiunan na parti sùit di Israel (Judea) tabata di opinion ku dia ta kuminsá ora solo ta baha i ta kaba 24 ora despues ora solo ta baha atrobe.

Pa e motibu ei, pa Hesus i su disipelnan (mayoria tabata di Galilea), Pasku a kuminsá djaweps mainta i a klousurá ora solo a sali djabièrna mainta. Pues, nan a kome e kuminda di Pasku djaweps anochi. Pa e hudiunan di Herusalèm ku a arestá i sentensia Hesus, nan Pasku a kuminsá ora solo a baha djaweps anochi i a kaba ku bahada di solo djabièrna.

Dios soberano a plania ku Hesus lo muri riba dia di Pasku. Hesus lo tabata riba krus na momentu ku e lamchinan di Pasku a wòrdu matá!

D. INFORMASHON ADISHONAL

Ta parse ku Juan tabatin un otro proposito ku su skribimentu. E Evangelionan Sinóptiko tabata eksistí pa algun dékada. Juan a skirbi un Evangelio distinto for di e tres relatonan ei di bida di Hesus. Esaki ta duna impreshon ku Juan intenshonalmente a skirbi un relato tokante bida di Hesus pa agregá informashon ku e Evangelionan Sinóptiko no a mensioná. Nos no por ta 100% sigur ku esei tabata e kaso. Ma no tin duda ku Juan a agregá hopi informashon nobo pa ku Hesus Su bida i ministerio. Di bèrdad, mas ku 90% di e contenido di e di kuater Evangelio por ta haña únikamente den e buki di Juan.

Ripará algun di e informashon úniko den e di kuater Evangelio:

1. E Evangelionan Sinóptiko a duna hopi espasio pa Hesus Su ministerio na Galilea. Maske Juan a duna atenshon na Hesus Su ministerio na Galilea (2:1-12; 4:43-54; 6:1-15), el a enfatisá Hesus Su ministerio na Judea. Nos por ta mas eksakto ainda. E eskritor a konsentrá hopi riba Hesus Su bishitanan na Herusalèm pa diferente fiesta:
 - Promé Fiesta di Pasku (2:23)
 - Fiesta deskonosi (5:1)—talbes tabata un Fiesta di Dedikashon
 - Un otro Fiesta di Pasku (6:4)
 - Fiesta di Tèntnan (7:2,8,10,11,14,37)
 - Fiesta di Dedikashon (10:22)
 - Último Fiesta di Pasku (11:55; 12:1,12,20; 13:1,29; 18:28,39; 19:14)
2. E Evangelionan Sinóptiko a mensioná solamente ún Pasku. Juan a nota sikiera tres Pasku (i kisas kuater).
 - Pasku #1 (2:13)
 - Kisas Pasku #2 (5:1)
 - Pasku #3 (6:4)
 - Pasku #4 (11:55)

Ta pa motibu di e informashon aki, skirbí den Evangelio di Juan, ku nos ta haña sa ku Hesus Su ministerio a dura 3-3½ aña.

3. E Evangelionan Sinóptiko a konta di Hesus Su parábolanan. Juan a ignorá e parábolanan i a kompartí Hesus Su alegorianan. Por ehèmpel, ta den e buki Juan ku Hesus a konta e storia tokante e bon wardador (10:1-18) i e bèrdadero mata di wendruif (15:1-6).
4. E Evangelionan Sinóptiko a konta di hopi milager ku Hesus a hasi. Ta komo si fuera Mateo, Marko i Lukas tabata ke konvensé e lektor dor di Hesus Su hopi milagernan. En kontraste, Juan tabata hopi selektivo ku e milagernan ku el a trese dilanti. E apòstel a selektá solamente ocho milager. Ma e milagernan ku Juan a selektá ta klásiko. Kada milager a proba Hesus Su poder den un sierto ramo:

Milager	Teksto
Hasi awa bira biña	2:1-11
Kura yu di ofisial di rei	4:46-54
Kura hòmber siegu, koho, seku	5:1-9
Kuminda pa 5000+ hende	6:1-14
Kamna riba awa	6:16-21
Kura hòmber siegu	9:1-12
Resurekshon di Lázaro	11:1-46
Kohe kantidat di piská	21:6-11

Solamente dos di e milagernan aki ta kontá den e otro Evangelionan: kuminda pa 5000+ hende i Hesus a kamna riba awa. (E milager ku Hesus a duna 5000+ hende kuminda, ta e úniko milager ku por haña den tur kuater Evangelio.)

5. E Evangelionan Sinóptiko (ku eksepsion di Mateo) no a kompartí hopi diskurso. Lukas i Marko a konsentrá mas tantu riba storianan. En kontraste, Juan a pone hopi énfasis riba Hesus Su palabranan. E siguiente diskursonan ta haña solamente den e Evangelio di Juan:

- Nase di nobo (3:1-13)
- E awa di bida (4:6-29)
- Defensa di Su divinidad (5:19-27)
- E pan di bida (6:22-71)
- E lus di mundu (8:12-59)
- E bon wardador (10:1-30)
- E diskurso den sala ariba i na kaminda pa Getsemané (13:1-16:33)
(Kristu Su orashon den 17:1-26 no ta un diskurso, ma tòg a komuniká hopi informashon.)

Mateo, Marko i Lukas a pone mas énfasis riba e reino. En kontraste, foko di Hesus Su diskursonan den Juan tabata Su Persona. Talbes esei ta splika dikon e buki di Juan no ta kontené e diskurso di Mateo 24-25.

Nos por ripará tambe ku algun di e diskursonan ku e outor a inkluí tabata kombersashonnan personal. Juan a enfatisá Hesus Su interes pa ku e persona individual mas ku Su kontakto ku multitutnan. E Evangelionan Sinóptiko no ta kontené e kantidat di entrevistanan personal manera Juan a inkluí. E buki ta kontené 27 kombersashon personal. Algun ta mas largu ku otro. Algun ehèmpel ta Hesus Su kombersashon ku Nikodemo (3:1-21), e muhé samaritano (4:1-42), e ofisial di rei (4:46-54), Pilato (18:28-19:16), èts.

E. DIOS SU ORARIO SOBERANO

Juan a duna indikashon ku Dios tabatin un orario pa Hesus Su tempu na mundu. Hesus tabata masha konsiente di e skema aki. Nunka Hesus tabata ún minüt tempran òf ún minüt lat. Kontinuamente El a hiba Su bida konforme e orario divino. El a laga su mama sa ku Su “*ora no a yega ainda*” (2:4). Hesus a bisa Su rumannan “*Mi tempu no a yega ainda*” (7:6,8). Dos biaha Juan a duna di konosé ku e hudiunan no por a arestá Hesus pasobra “*Su ora no a yega ainda*” (7:30; 8:20).

Ma ora tempu a yega pa Hesus wòrdu krusifiká, tur kos a kambia. Awor Hesus tabata sumamente konsiente ku Su ora a yega! Poko tempu promé ku e dia ei, Hesus a deklará, “*E ora a yega pa e Yu di hende wòrdu glorifiká*” (12:23). Bispu di Su krusifikashon, Juan su komentario tabata ku “*...Jesus, sabiendo ku Su ora a yega...*” (13:1). E mésun anochi den Hesus Su orashon, El a bisa, “*Tata, e ora a yega, glorifiká Bo Yu, pa e Yu glorifikáBo*” (17:1).

F. PORTRÈT DI HESUS

E eskritor tabata hopi interesá pa su lektornan sa bon kla ken Hesus ta:

1. E apòstel a konsentrá riba Hesus Su divinidad i humanidat—ku E ta Yu di Dios i tòg Dios inkarná:
 - a. Juan a pone mas énfasis riba Hesus Su divinidad ku e otro Evangelionan. Juan su meta ta pa proba ku Hesus ta Dios.
E divinidad di Hesus mirá den Evangelio di Juan por ta un estudio ekstensivo:
 - “*e Palbra tabata Dios*” (1:1)
 - “*Abo ta Esun Santu di Dios*” (6:69)
 - “*Ami i e Tata ta ún*” (10:30)
 - “*Esun ku a miraMi a mira e Tata*” (14:9)
 - “*Mi Señor i mi Dios!*” (20:28)
 - E “*Ami ta*”nan den e Evangelio ta importante. Ku e palabranan aki Hesus a proklamá ku E ta etèrno, ku El a eksistí promé ku El a bin na mundu i ku E ta Dios. “*Ami ta*” ta kòrda nos di e manera ku Dios a identifiká Su mes na Moises (Eksodo 3:14). Nota e “*Ami ta*”nan:
 - ✓ *Ami ta e pan di bida* (6:35,48)
 - ✓ *Ami ta e lus di mundu* (8:12)

- ✓ Ami ta promé ku Abraham (8:58)
 - ✓ Ami ta e porta (10:7,9)
 - ✓ Ami ta e bon Wardador (10:11,14)
 - ✓ Ami ta e resurekshon i bida (11:25)
 - ✓ Ami ta e kaminda, bèrdat i bida (14:6)
 - ✓ Ami ta e bèrdadero mata di wendruif (15:1,5)
 - ✓ Ami t'E (18:5)
 - ✓ Nota espesialmente e "Ami ta" den 8:58 unda Hesus ta deklará ku E ta e YHWH (Jehová/Yahweh) di Tèstamènt Bieu ku a revelá Su mes na Moisés.
 - ✓ Nota tambe 4:25-26; 8:24,28; 13:19
 - ✓ Tambe tin otro pusibilidat (6:20; 7:34,36; 14:3; 17:24)
 - Nos a mira tambe ku Juan a mostra ku Hesus tin kontrol total riba Su mes bida i morto, usando e frase "*Mi/Su ora (no) a yega*":
 - "*Su ora no a yega*" (7:6,8,30; 8:20)
 - "*Su ora a yega*" (12:23,27; 13:1; 17:1)
- b. Hesus Su Humanidat
- Maske no tabata Juan su meta prinsipal pa komuniká ku Hesus tabata hende, tòg por haña esei den e buki.
- I) Deklarashon dirèkt
- "*I e Palabra a bira karni i a biba meimei di nos...*" (1:14)
- II) Kalidatnan humano ku Hesus a demonstrá
- Hesus a kansa (4:6)
 - Hesus a pidi awa pa bebe (4:7)
 - Hesus a yora (11:35)
 - Hesus Su morto físiko (19-20)
- Hende ku no tabata konosé Hesus bon, a yam'E "*E Hòmber ku ta wòrdu yamá Jesus*" (9:11). Ma esnan ku a biba kun'É a yam'É "*Esun Santu di Dios*" (6:69).
2. Juan a enfatisá Hesus Su union kompleto ku Su Tata (1:18; 10:15,30; 14:9-11; 17:11,21-23)
3. Juan a enfatisá Hesus Su dependensia kompleto di Su Tata i Su obedensia nE (4:34; 5:19,36; 8:26-29,55; 10:17,18,32,37,38; 14:10,31; 15:10; 16:28; 17:1-5).

Literatura Konsultá

- Demaray, Donald E. *Bible Study Sourcebook* (Los Angeles: Cowman Publishing Company, 1964), p. 144-148.
- Gromacki, Robert G. *New Testament Survey* (Grand Rapids, Michigan: Backer Book House, 1981), p. 130-148.
- Gundry, Robert H. *A Survey of the New Testament* (Grand Rapids, Michigan: Zondervan Publishing House), p. 98-108.
- Jensen, Irvin, L. *Jensen's Survey of the New Testament* (Chicago: Moody Press, 1981), p. 174-197.
- MacArthur, John. *MacArthur's Quick Reference Guide to the Bible* (Nashville, TN: W Publishing Group, 2001), p. 196-202.
- Miller, Adam W. *Brief Introduction to the Old Testament* (Anderson, Indiana: Warner Press, 1964).
- Poehnell, Gray. Bib 102, New Testament Survey notes, Prairie Bible Institute, 1983.
- Tenney, Merrill C. *New Testament Survey* (Grand Rapids, Michigan: Wm. B. Eerdmans Publishing Co., 1980), p. 185-197.
- Tenney, Merrill C. Gaebelien, Frank. E. ed. *The Expositor's Bible Commentary*: (Grand Rapids: Zondervan Publishing House, 1990), vol. 9, p. 3-26.
- Wilkinson, Bruce & Boa, Kenneth. *Talk Thru the Bible* (Nashville, TN: Thomas Nelson Publisher, 2002), p. 335-343.